

四庫全書

集部

欽定四庫全書

集部  
四明文獻集卷五

詳校官庶吉士<sub>臣</sub>張溥

主事<sub>臣</sub>呂雲棟覆勘

覆校官中書<sub>臣</sub>汪師曾

校對官監丞<sub>臣</sub>張曾炳

謄錄監生<sub>臣</sub>沈成均

欽定四庫全書

四明文獻集卷五

宋 王應麟 撰

誥

翰林學士知制誥兼侍讀除同知樞密院事誥

詞科所業  
後篇同

勅股肱一體相成祇適時幾之戒文武萬邦惟憲儀圖  
翰墨之英朕迪前人先志成功所在咸平有若臣旦在  
嘉祐有若臣修擢繇禁林登貳樞府帷幄收頗牧之績樽

俎折葷允之謀無競維人式序在位翰林學士知制誥  
兼侍讀某養剛大之氣好深湛之思學道乎中庸總五  
經之妙論文澤乎仁義信三代之餘風灼見俊心贊為  
名命代言溫雅發號施令罔不臧勸誦從容陳善閑邪  
謂之敬屢訪河西之邊事咸聳山東之詔書嘉其知軍戎  
之情進而與甲兵之問爾猷則告我武惟揚噫夙夜基  
宥單厥心勿替協恭之助國家閒暇明其政具嚴思患  
之防以又受民俾紹先烈可授同知樞密院事

起居舍人兼侍講除中書舍人兼禮部尚書誥  
勅周史之掌贊書列於禮典舜官之出帝命先以秩宗  
朕登崇譽髦藻飾治具迪簡敷經之彥久儀簪筆之聯  
錫我茂恩對時妙選起居舍人兼侍講某簡廉載采博  
審好脩砥行立名濟濟扶揚之禮弼中彪外裒裒樂安  
之文仁義其言藹如直諒多聞益矣欽起居而在右君  
舉必書考仁聖以陳前古訓有獲丕從朕志曰求厥章  
昔元祐擢軾於螭塗晉司帝制紹興真導於鳳閣復貳

春卿惟文學咸精能俾播告不匿指咨爾兼組賁於演  
綸為誥有古風罔俾仲舒之媿同日加兩命允謂知章  
之榮予欲善辭令以華國汝為予欲觀會通以秩典汝  
翼庶幾終譽式克欽承可授中書舍人兼禮部侍郎

按詞學指南云誥告也其原起於湯誥周官太祝六辭  
三曰誥士師五戒二曰誥成王封康叔唐叔命以康誥  
唐誥漢元狩六年立三子為王初作誥白居易集翰林  
曰制詔中書曰制誥蓋內外命書之別邇來西掖初除  
試誥而命  
題亦曰制

章鑑特授端明殿學士同簽書樞密院事誥外  
制

掖垣藁以下  
同咸淳八年

勅祗勤外治劫忒中樞以救寧武功倚羣賢之彊本惟  
幾康弼直咨同德之合謀迪簡蓋臣誕揚明命具官某  
器裕而守正識融而履純中和不倚不流得諸涵養之  
厚學問如磨如琢從我新益之游俊心灼知賢業可大  
乃踐爭臣之列乃儀常伯之聯繩愆格其非出納惟允  
陳善謂之敬就將有光察其忠嘉宜在宥密念采薇守  
衛之策正徹桑綢繆之時風寒嚴護於江淮月掇冀清

於襄峴有常立武無競維人若願浩繇天官而升若晏殊以宮宋之舊俾陪借籌之畫式協推車之忱班書殿而總要經爵躬圭而增多邑其贊帷幄籌之運以成道德威之強噫在元祐則岩叟謹言用君子而保國在中興則臣昂遠慮申軍律而治兵共濟明謨克邁前哲可鑑仕至宰相聞元兵日迫托故徑去太皇太后遣使召還罷相予祠鑑居位多許可時目為滿朝歡

李庭芝特授參知政事依舊淮東安撫制置大

使兼知揚州兼淮西策應大使誥 德祐元年



勅祗適先猷儀圖摺輔慶厯彥博之參國秉肅將河北  
之征師紹興臣昂之預政除擢繇江右之大閩乃睠幹  
方之績延登駿假之聯載錫褒綸率循茂典具官某洪  
深而肅摺碩大而光明曰閩外制之蘊知國知兵之路  
言長城遠矣兼允文允武之才屬邊瑣之孔艱嚴風寒  
之謹護淮浦戒我師旅率勵勤王之忠執政猶吾股肱  
灼知體國之志朕愼采薇治外之急思集蓼慙患之謀  
勅命惟時惟幾盍惜陰而攘却繼今立政立事其揆策

以贊襄是用擢貳台衛仍分閫鉞以協濟日萬幾之務以  
耆定月三捷之勲旂壘如光弼之增明廊廟有德裕而  
益重衍其采邑壯乃威聲噫東方畢公率之雖身外而  
心王室北伐張仲在矣共戎服以奏膚公無競維人往  
敬用治可

李庭芝特授知樞密院事兼參知政事誥

勅思濟多艱疇咨碩輔文附衆武威敵懋時屏翰之勲  
內脩政外攘夷簡在股肱之寄圖任亦惟求舊折衝何

必臨邊爰登一賢俾贊二朽具官某才鉅而識遠德粹  
而量閎儒士知戎情挺挺崇詩書之望身外心王室倦  
倦安社稷之忠金城淮浦之要衝砥柱廣陵之重鎮執  
訊獲醜屢奏膚功協恭和衷肆命予翼慨念勤勞於疆  
圉莫如謀畫於廟堂第一星曰天樞晉陟籌帷之冠間  
兩社為公輔復參台路之謨若王閩之在淳熙若昭先  
之於嘉定迪惟注意允矣兼資趣介圭之來朝衍采邑  
而孔厚噫率有指疆土朕思救武以圖功其克詰戎兵

爾尚又民而立政懋展真儒無敵之畧適恢中興復古

之規可

以時阿朮圍揚久庭芝守禦益力臨安既破阿朮以阿朮手詔諭降不從及帝次瓜洲太皇復賜

詔曰比詔卿納款日久未報豈未悉吾意尚欲固圍耶今吾與嗣君既已臣服卿尚為誰守之庭芝不答謂其

客曰吾惟一死而已阿朮復遣使持世皇詔招之庭芝斬使者焚詔書城上糧既盡令將校出粟雜牛皮曲藥

以給之民有自食其子者猶力戰不屈戰於丁村軍潰阿朮請於世祖赦焚詔斬使之罪令早歸款庭芝不納後大戰揚子橋姜才將回回引刀向張弘範弘範迎刺之流矢中才肩才拔矢揮刀而前元師辟易不敢逼

陳文龍特授中大夫同知樞密院事兼權參知

政事誥

勅祈永命開中興維拈輔同心之助詰戎兵揚大烈維  
世臣繼美之能永懷孝祖之聖謨緬想乾道之賢佐正  
色敢言之操知為忠臣贊元經遠之猷進貳宥府天宓  
我成功所予迪惟前人光茲復見於魁儒其適遵於陟  
典具官某識明而才裕學粹而器闕仁有勇德有言蹇  
蹇救時之志和不流中不倚恢恢穆綽之謀繇首諫以  
疇咨登中樞而共濟參翼天保采薇之治協圖蒸民常  
武之勲慨四郊多壘之未清懍一日萬幾之孔棘若汛

濤而求烝楫若支厦而萃良工趣躋淳化名臣之官峻  
陞元封執政之秩乃兼駸假用又多艱進爵侯圭增封  
邑采以隆股肱之瞻以計社稷之安噫子房決勝而運  
籌蓋益恢於長策召公是似而錫祉尚念紹於今名朕  
方篤繩武之思爾克邁象賢之訓可

文龍本名子龍狀元唱名度宗賜是

名德祐元年後棄位遁去益王立漳州亂以文龍為宣撫使討之復知興化軍元兵至城下通判曹澄孫開門降執文龍欲降之文龍指其腹曰此皆節義文章也可相迫耶卒不屈械送杭州不食死

劉黻特起復授端明殿學士知慶元府沿海制

置使誥

勅朕慨思時艱申飭外治陟禹迹至海表其克詰於戎  
兵命畢公釐東郊以謹固於封守睠論思之峻望懋牧  
御之殊庸賜齊履以重臨墨晉經而疆起具官某學茂  
而識裕志剛而氣和議論通古今動衆心介然蹇諤之  
操文武有威風知大體展也經綸之才以常伯簡知於  
先朝惟連率著勲於鄆水黍苗之澤允洽甘棠之愛不  
忘雖孝思關 騫之永懷而民望期霸及之再至矧狼

心之匪茹嚴鯨沛之預防牖戶陰雨之備未脩戈船下  
瀨之師多缺人惟求舊戎有良翰弓鉞之錫頗征趣為  
朕往金草之事無辟難以蒙辭仁廟咨臣靖鎮桂林孝  
祖詔臣介帥荆峴事維孔棘禮有從權是用躋峻職於  
承明聳雄稜於制閩即里門而眈印冀溟渤之澄波噫  
精神彊本折衝既念移忠之義喉舌賦政於外益圖救  
武之功勿遲其行式克用又可

益王登位以嚴為參知  
政事赴召卒於羅浮

常楙特授端明殿學士提領戶部財用誥



勅八政食貨為先慨民生之寡遂九式制用有節念兵  
費之孔殷欲斟酌於源流必培護於根本淳化命總計  
之使建炎重提綱之權適遵舊章簡畀碩彥具官某鎮  
密而粟從容以和善教得民有長者之風而不懦儒雅  
飭事有能吏之才而不苛屢底績於价藩旋騫華於禁  
路論思藹嚴徐之譽銓綜推裴馬之公惟錢穀之入幾  
何慄興師之弗給而公私之積可痛嗟足食之尤艱顯  
其任則可以通有無振其領則可以柅欺蠹陟承明祕

殿之峻治版部邦計之繁眡昔三司冠儀八座噫國以  
義為利朕方圖損上益下之規財者人之心爾勉行愛  
民厚俗之政惟正是義其永有辭可

按林嘗援晉太子  
申生事欲為濟王

五後德裕二年拜參政宣麻  
慈元殿文班止六人繼而逃去

文天祥特授端明殿學士依舊江西安撫使浙

西江東制置使兼知平江府誥

勅元戎十乘先行式倚真儒之望師中三命承寵適隆  
方面之權朕若稽先朝之舊章最重文明之邃職內以

待畿廷之彥外亦褒帥閫之賢王素之牧平涼程戡之  
涖益部皆膺茲選今得其人具官某實學濟時英猷緯  
國文有武備義槩質於神明儒知軍情忠忱貫乎霜日  
傳檄召兵而志士奮纓冠赴難而國勢張不圖素定之  
營允謂寡二之畧予欲復江表之疆宇命爾攘除予欲  
壯淞右之翰藩咨爾脩扞威稜聳前茅之令醜類懣破  
竹之危惟關  
位必崇惟名之重者功必集乃隋  
班規殿之峻關  
闡之嚴噫邦咸喜戎有良翰茂

對陟明之渥身在外乃心王室趣成敵愾之勲可

接天祥自

贛州入衛上書宜分境內為四鎮  
責任攻取者以為迂詔知平江府

翁合特授試尚書禮部侍郎誥

德祐元年

勅朕慨四維之未張念多艱之求濟為國天地與並必  
辨上下以定典禮夙夜惟寅必進英雋以彊本乃矐  
橐班之舊誕敷環召之榮具官某內美脩能瑰意琦行  
韶鳴玉潔淵哉寔好斯文山立時行紛獨有此姱節羽  
儀侍從之列斧藻副誥之華駒皎皎以莫維鳳縹縹其

高遠予未堪難疇咨百君子之謀爾有嘉猷申命小宗  
伯之職肅治軍之儀汝翼歲越紼之祭汝明適成樽俎  
折衝之功匪曰籩豆司存之末相見何晚周五禮有待  
而行今急而求魯兩生豈不能致式克用義惠然來思  
可按合閩人著古今絕唱嘗論賈似道以妬賢無比之  
林甫輒自托於伊周以不學無術之霍光敢效尤於  
莽操總權罔上賣國召兵專利  
虐民滔天之罪乞遠投荒昧

高斯得依前行起居舍人特授兼侍讀誥

勅具官某朕聞學於古訓乃有獲詢茲黃髮則罔愆在

天聖時臣爽以尚書勸講在元祐際臣維因寶訓進規  
延登耆儒聿駿先烈爾履粹而養以直學醇而資之深  
惟耆成人肯來覽德曰太史友命爾紀言睠聚辨居行  
之勤倚薰陶涵養之益何相見之晚也試垂聽而問焉  
百篇雅興之文中興脩攘之治示我顯行率惟教功清  
閑之燕盡精思朕樂親於宿望溫潤之氣可開道爾念  
紹於前脩斯得蜀人嘗論似道  
之罪與關氏合族

文天祥持授集英殿修撰樞密都承旨依舊江

西安撫副使誥

勅具官某多難維其棘矣有嘉衛上之忠來朝又何予  
之載錫在師之寵脂車趣駕進律敷恩爾才裕經綸器  
兼文武以臯伊冠倫之望有管樂濟時之猷糾合義師  
欲以身任國家感情外患不以賊遺君父憂分閭畀重  
弓導旨預前籌之畫朕方盱食而慮爾盍夜衣而行知  
當纓冠投袂之時正如奉饗沃釜之急用躋華於書殿  
俾眡渥於從涂脩戈矛與同仇亟其入覲運帷幄而決

勝尚賴協謀可

天下勤王詔至天祥捧之涕泣發郡中豪傑有衆萬人遂入衛其友止之天祥

曰國家養育三百年一旦有急徵天下兵無一人一騎赴者吾欲以身殉之庶天下忠義將有聞風而起者義勝者謀立人衆者功濟則社稷可保也天祥平生自奉甚厚痛自抑損盡以家貲為軍費其言曰樂人之樂者憂人之憂食人之食者死人之事

李芾特授祕閣脩撰樞密副都承旨依舊知潭

州兼湖南安撫湖北鎮撫使誥

勅具官某十國為連有帥莫重於艱難之日諸侯有功進律莫先於守禦之勞爾忠義紹於儒先器能濟於世



嫩中立不倚姦邪所忌連蹇駒谷壯氣不衰宅牧星沙  
分閩鄉部護風寒奏月捷精神折衝使湘水無波嶽鎮  
不搖朕嘉乃勤賸延閣紬書之職貳宥廷導旨之聯文  
武二事兼之矣時幾孔棘狡謀匪茹惟事事備以清氛  
侵集救功用對揚我師中錫命之寵可

帝守潭州乘城  
死戰有招降者

斬殺以狗力不能支召帳下沈忠遺之金曰吾力竭分  
當死吾家人亦不可辱於俘取酒飲其家人盡醉乃徧  
刃之帝亦引頸受死忠縱火焚其居還家殺其妻子復  
至火所大慟自刎幕僚陳億孫顏應焱皆死潭民多舉  
家自盡城無虛井  
縊林木者相望

謝枋得特授秘書省著作郎兼權司封郎誥

勅具官某春秋成而亂賊懼作執秩以正官用能一戰  
策勲朕崇獎氣節之士兼史職郎選而命之庶有壓難  
折衝之功爾以正直忤大姦義形於色為一鄉之望廣  
信控風寒要衝惟季梁在隨楚不敢謀忠信行乎州里  
隱然金湯之固是用進長承明兼組主爵凡搏力之法

扞城之備暨守臣共圖之既克有定謂爾來矣可

枋得嘗以

發策迂似道見斥及聞沿江郡縣內附自以與呂師夔  
善乞朝廷使之行城又乞身至江州與呂文渙議事會

文渙北行不及而反俾知信州呂師夔徇江東枋得迎戰敗績奔建寧山中世祖召至京師七日不食長書累萬言貽留夢炎稱大宋遺臣大元遺民食棗子七枚以死有文章軌範行世

姚訔特授帶行太府寺丞依舊知常州誥

勅具官某毘陵控風寒之衝澗河以西若防之制水恃為屏翰狡焉侵軼亡謀壹大治之則可以固吾圉厭難折衝惟良二千石是賴爾以世臣居是邦即家剖符義槩奮發且戰且守服勞維多外府轉丞示我陟明之典益堅捍禦亟奏膚公朕將有懋賞可

按訔希得子劉師勇復常州訔知州

事力戰固守伯顏命降人王子良役城外居人運土為壘併人以築之又殺民婦取其乳煎膏作砲焚其牌秘城破告死之

黃萬石依前資政殿學士特陞江西制置大使

兼江西轉運使誥 德祐元年

勅宣力四方汝為既賦恩於政路右師三錫承寵蓋增重於閩權昔高廟之耆武功命臣綱而鎮江右宏開制閩植畀大名祇率舊章誕敷褒律具官某經綸實學開濟遠猷吉甫文武憲邦才周應變孔明危難受任志切

救時纓冠往以扶王事之艱投袂起以赴鄉鄰之急四  
郊若防制水恃乃扞城六師以脩我戎俟其衛社慨天  
塹濤波之沸慨風寒根本之憂率四方諸侯責機衡之  
異渥謀中軍元帥峻弓鉞之顯征分陝之任益隆殄虜  
之勲可冀兼華漕節植屏洪都噫元戎先十乘之行朕  
欲壯中流之襟帶一賢制千里之難卿其恢外禦之規  
摹精神折衝則氣勢強指授當任則將士勵既克有定  
適圖爾庸可

萬石在江西不能禦敵阿里海牙取隆興  
萬石自撫州奔建昌降大元首制三搭為

士大夫之倡其將米立不降萬石諭之曰吾在宋官銜一圓牌寫不盡尚降汝至小何不降米立大罵齧其舌以血唾其面就死萬石以大元軍入邵武文天祥開府南劍經畧江西遂復邵武萬石敗走

趙孟傳特授華文閣直學士沿海制置使知慶

元府誥

勅朕申儆豫防疇咨良牧師保世祚表海聿懷宗老之遺芳孝恭尹茲東郊迪簡庭聞之令望我有明命責於价藩具官某質厚而器闕心醇而忱裕以仁者勇協贊去凶之謀為同姓卿獨堅守節之志若昔理祖眷爾前

人京兆懋彈壓之功司徒敷寬和之教繡游鄉國閭制  
滄溟迨今甘棠之餘思復見裳華之趾媿尹神臯而曳  
履既振家聲即里社以分弓俾踐先職躋舜閣之邃直  
耀漢綬之榮觀軼兖州再世之光邁安陽奕葉之盛水  
犀之師爾其練羽佩犢之民爾其鎮綏元帥閱禮樂詩  
書無忝象賢之助州里行忠信篤敬通觀報政之成可  
元兵至明孟傳迎降以酒飲解刺刃手震酒傾解  
刺刃曰吾豈非人耶何畏懼乃自引滿而飲之

家鉉翁依前直華文閣樞密副都承旨特授知

臨安府浙西安撫使誥

勅具官某朕慨思時艱廸簡賢尹商邑為四方之極用  
謹固於本根周官倡九牧之風乃力辭於將從有嘉廉  
遜載錫寵褒爾粹學融明素履脩潔和平之政如古循  
吏所稱清直之名惟前文人是似世濟其媿人皆曰賢  
肆予更政化之初命爾導宥密之命咨日畿浩穰之寄  
陟地官論思之聯怡靜之操不渝忠謹之風可挹予欲  
成奠枕皇皇之績爾惟有游及恢恢之才彊本折衝尤



難於歐蔡承明之日流化自近匪但循趙張發摘之規

可

鉉翁位執政伯顏令程鵬飛取太后手詔諭州郡降附太后從之檄執政皆署鉉翁獨不從使者命縛之

鉉翁曰中書無縛執政之理乃止後為祈請使國亡官之不從後至河間講易歸臨安以死有春秋傳行世

### 楊文仲特授集英殿脩撰知漳州誥

勅朕選渤海賢良之守用又嘉師厭承明侍從之勞難  
違雅意睠漳浦介藩之重有臣熹善政之餘今得其人  
乃試以政具官某魯諸儒之學周吉士之風擇乎中庸  
玉瓚黃流之器好是正直朱弦清廟之音出奏民庸入

儀禁路命時貳於起部職簡而清咨綰長於國庠士有  
所式方羣彥聚朝而共濟慨一賢補郡之獨先惟朕勉  
從俾爾謹牧越在外服曷思自葉以流根式是南邦必  
圖厚下而立本勿謂閩土之遠亦若周畿之間佇聞政  
聲勿替猷告可

文仲蜀人虞  
伯生外祖

呂大圭特授秘閣脩撰知漳州誥

勅具官某朕擇選良吏而宅乃牧嘉闕成人而遂其志  
體臣子民之仁一也爾學醇行粹為時宿儒訪予落止

入說邇英有涵養薰陶之益司宗惟亞典制典選意新  
才壯何求退之果也漳浦价藩爾居相邇命爾懷二千  
石綬以蓬閣論撰闕其歸身處江湖之遠名在奎壁之  
躔詩云毋金玉爾音而有遐心可

大圭溫陵人嘗為中書舍人有春秋五論

集傳或問行世

文天祥依前權工部尚書都督府參贊軍事江  
西安撫使特授浙西江東制置使兼知平江  
府誥

勅謀元帥將中軍簡在說禮崇詩之彥分六卿倡九牧  
時惟制治保邦之規朕疚懷艱危注意英雋有嘉衛社  
之志誕畀制閫之權具官某碩大而光明宏深而肅括  
武文兼備有經營四方之才忠義自將有獎率三軍之  
畧惟碩望冠寵甲之選蓋皇祖為燕翼之詒討亂畧以  
傲師人百其勇追殊遇而欲報朕知乃心咨胸中甲兵  
之奇付閫外弓鉞之任若高皇命重臣宅牧合江淝以  
顯征若孝廟詔常伯奪情念邊疆之孔棘摠中權於方

面殿巨屏於吳門內以護日畿之本根外以復天塹之險阻規摹有素勲業可期噫元戎十乘先行共武服而

國定師中三錫承寵以衆正而民從適成攘狄之功丕

闡用儒之效可

元兵破四安召天祥入衛天祥行平江無固志矣天祥拜右相至軍前慷慨不

屈伯顏拘之與祈請使偕行至鎮江逃去浮海如温州起兵江西志圖恢復空坑大敗就執入元都不屈南望死拜而

陸秀夫特授淮東提刑兼淮東制置使司參議

官誥

勅具官某古者兵刑一致猾夏姦宄皆士官所懲獻囚  
皆魯泮之事爾以通材敏識久參閫重東淮祥刑使者  
缺命爾愛我嘉師察獄以情斯可一戰乘輶飛檄爾實  
兼之審讞洗冤籌邊決勝所以極黎元之命者在此徃

欽哉可

秀夫奉使伯顏軍前求稱伯姪不從後以兵會  
二王海上位至宰相儼然正笏如平時或在行

中悽然泣下以朝衣投淚盡濕凡述作皆出其手雖在  
匆遽猶日書大學章句勸講崖山既敗乃仗劍驅其妻  
子曰而去怕我不來乃詣帝舟啟帝曰少  
帝太后已辱陛下不可再辱抱帝赴水死

皆萬壽特授復州團練使知嘉興府兼成都府

路安撫副使誥咸淳七年

勅具官某率寧人有指疆土尤重嘉川謹侯度脩爾戎  
兵其惟良將懋簡折衝之績誕敷進律之褒爾挺志忠  
純受才沉毅壯謀定金城之畧雄稜憺玉門之關統戍  
沔陽而威信孚宅牧瀘水而保障固肆疇咨於魁勇俾  
易鎮於捷為正秩戎團仍貳帥閫惟嚴於備禦則江流  
靖惟勤於撫綏則民心安往奏膚公祗若明訓可德祐元年

萬壽以嘉定及三龜九頂紫雲城降於大元自  
後兩川郡縣皆送款獨張珏固守重慶不下

張起崑依前武功大夫復州團練使特陞除帶

御器械知夔州兼夔路安撫副使誥

勅具官某朕睽蜀道以注懷屬夔門之謀帥救武功於  
西土廸簡安邊之良得猛士守四方適求固圉之績爾  
謀老事壯知深勇沉宅收健為暨暨扞城之畧參華方  
而泐泐敵愾之忠疇咨折衝乃命改鎮肆頒進律之渥  
明陟扈帶之聯其覽平沙八陣之圖以護長江萬里之  
險可



張世傑依前保康軍承宣使樞密副都承旨特  
授沿江制置副使知江陰軍兼浙西策應使

詔 德祐元年

勅閩外制將軍必有重弓之備師中承天寵趣頒三命  
之榮朕植江表之藩籬圖浙河之屏翰乃授西討之畧  
以先元戎之行具官某志節忠純才猷明果帷幄決子  
房之勝屢敵愾以獻功草木知萬福之名獨解紛而排  
難義槩倡勤王之勇雄稜壯禦侮之威憤妖壘之未平

慮狡謀之匪茹烝楫電邁有捕鹿犄角之形虺旅颺馳  
有擊蛇首尾之勢游騰月捷大振天聲予欲嚴守禦於  
澄江以捍蔽近甸予欲復疆理於京口以進取列城擢  
貳方面之權兼綰郡符之寄合漢將籌策之用建唐使  
應援之名運掉適宜士氣百倍竒正迭出虜祲一清豈  
止日畿之安庶幾天塹之定若昔臣浚受任中興天惟  
恣我民朕念紹於前烈師以順為武爾亟奏於膚公可  
張世傑依前保康軍承宣使帶行樞密都承旨

特授龍神衛四廂都指揮使誥

勅脩甲兵與偕行旣懋幹方之畧聽鼓鼙而思帥聿隆  
進律之褒具官某果毅而尚謀忠純而好義勵擊楫清  
中原之志首敵愾以獻功膺推轂遣將軍之權獨折衝  
而制勝壯槩為勤王之倡雄稜期殄寇之勲朕方赫濯  
威聲將攘除於戎醜爾獎率義旅庶清肅於江流載考  
中興之名臣尤重廂部之陟典內以嚴鈞陳太微之衛  
外以澄金陵北固之氛噫定王國奏膚公式倚良翰之

重在師中承天寵嗣放懋賞之榮可

張起岳特授寧遠軍承宣使龍神衛四廂都指揮使依舊知夔州兼夔路安撫副使誥

勅艱危之際恃節義為金城忠良之臣植封疆為砥柱  
孝寬之保玉壁真卿之守平原今見其人朕嘉乃績具  
官某秉心純實立志雄剛草木知萬福之名帷幄決子  
房之勝愾楚氛之甚惡歎蜀道之至難細柳堅壁之威  
鎮安夔路勁草疾風之操克復開江誅偽使而焚其書

挫醜虜而奪之氣奏封來上大節可嘉峻躋容管之承  
流班亞齊越密聯廂部之分衛職近周廬式昭褒賞之  
恩用為屏翰之勸噫當一面屬大事朕不忘固圉之勤  
獎三軍定中原爾益勵折衝之畧適收雋捷嗣對寵光  
可

許文德特授

闕

州觀察使依舊知淮安州淮東

安撫副使兼淮東策應副使誥

勅戒戎旅率淮浦適成却敵之雋功承天寵在師中載

錫策勲之懋賞有嘉凱用勸戎昭具官某識明而志忠  
謀老而氣壯愴雄稜於閩外如虎在山殿重鎮於淮陰  
若罷當道賢於長城矣豈憂匈奴哉愾獫狁之亂常挾  
叛臣而犯順犬羊驅十萬之衆蟾蜍交四面之鋒維我  
屏翰之良悉心戰守之畧畫禦宵擊保固金湯之疆電  
掃風除攘殄旃裘之醜大奏采薇之捷優獎前茅之勞  
正使領於廉車聳軍容於方面既酬茂績益勵英猷念  
多壘之未清慄東陲之孔棘用師觀釁而動乘勝氣以

盪平擊敵以滅為期趣勁兵而應援式克者定尚有殊  
褒可

田謹賢特授親衛大夫福建觀察使依舊知恩  
州兼御前諸軍都統制誥

勅國家多難正遠臣敵愾之秋節義天閑嘉良牧效忠  
之志趣提師而入援爰進律以示褒具官某性行端純  
器資果毅附衆威敵而兼文武如穰苴之善兵銜訓嗣  
事以考度程若弘正之濟美奕世守封疆之固一心堅

忠孝之傳憤獫狁之肆凶率熊羆而奮勇朕方馳羽檄  
以召勤王之士爾乃飛驛書而勵報國之忱擊楫誓清  
纓冠往救平原為金城之倡恨未識真卿之賢河西布  
璽書之明爾用錫賚融之寵陟崇階於親衛躋峻秩於  
廉車汝捍我於艱其援桴鼓而進功多有厚賞以須賜

旄鉞之榮

田氏世襲思州與播州楊氏世姻  
宋亡入朝官榮祿大夫封義敏公

楊邦憲特授親衛大夫利州觀察使依舊知播

州兼御前諸軍都統制誥



勅聽鼓鼙而思帥孰濟時艱脩戈矛與同仇載嘉義旣  
爰趣援師之至誕錫褒律之榮具官某植志忠純秉心  
洪毅臨機料敵識明玉版之六發御衆收人威憺玉關  
之萬里奕世固封疆之守一忱堅節義之閑憤蛇豕之  
肆凶合熊羆而奮勇朕每飯不忘於鉅鹿爾惟志常馳於  
伊吾獎率勁兵捍衛多難真卿未識獨倡平原之盟竇  
融來朝宜錫河西之詔恩加增秩檄召勤王陟親衛之  
崇階峻廉車之殊渥天助者順亟其戒戎乘之行師克

在和則有秉鉞之命可

邦憲世襲播州十八世宋內附  
遂請降世祖下璽書撫諭授龍

虎上將軍侍衛親軍都指揮使播  
州安撫使子孫相繼襲寵錫尤厚

姜才依前右武大夫特授

闕

州防禦使依舊建

康府駐劄御前諸軍都統制誥

勅安邊竟在良將久宣敵愾之勞共武服奏膚公式厚  
策勲之寵有嘉壯槩載錫褒章具官某粟銳而好謀忱  
恂而尚義隱若敵國差強人意泐泐衛上之忠率彼淮  
浦以脩我戎暨暨冠軍之勇狡焉醜類梗我要衝逞蛇

豕以薄城驅虎狼而犯順郊多壘辱也獨被髮以纓冠  
鼓三軍進之乃雄心而鳴劔先鋒鏖戰入陣勦除亟拔  
破竹之勲來獻采薇之捷威稜大振賞典趣放陟使領  
於捍防表戎昭之果毅有功見知則說用勸熊羆之臣  
擊敵以滅為期盡清狐兔之穴勉建殊績嗣有茂恩可  
姜才在揚州屢捷益王登極李庭芝命朱渙守揚州而  
與姜才將兵七十趣泰州將東入海庭芝既行渙以城  
降阿朮圍泰州驅庭芝妻子至陴下招降姜才發九疽  
不能戰泰州守將孫貴降庭芝與才俱就執至揚州才  
憤罵不已元帥不忍殺之朱渙曰揚自用兵以來積骸  
滿野皆庭芝與才所為不殺何俟乃皆殺之揚民莫不

泣下由是淮  
東州郡皆降

陽立依前右武大夫特授闕州觀察使依舊知

涪州誥

勅聽鼓鼙思將臣欲濟艱危之會做師徒討亂畧盡優  
獎擢之恩其錫明綸以旌壯槩具官某忠誼根於天性  
知畧習於邊籌砥柱蜀道之衝賢長城遠矣湯池涪川  
之險曰將軍制之獨堅細柳之屯屢奏采薇之捷士氣  
大振敵膽為寒脩兵與偕行久徯勤王之旅出車維其

棘趣收盡敵之勲宣力既多陟明可後武爵峻躋於左  
廣使名超進於廉車賞不踰時益勵熊羆之勇師直為  
壯遂清蛇豕之雄亟成雋功嗣對褒律可

苗再成特授拱衛大夫依前和州防禦使帶行

帶御器械知真州誥

德祐元年

勅王事多難維其棘師克在和我武惟揚伐有辭功多  
厚賞某鳴劔伊吾之壯志堅壁細柳之英標自守圍於  
儀真克執醜於江澣率勁兵而勇往徑擣重巢燬列柵

以無餘連收雋捷忠忱足以振士氣義槩足以懾戎心

賁褒律之殊榮晉橫班之峻秩用錫爾祉益殫拱扈之

勤立定厥功嗣有寵褒之典可

阿朮攻真州再成就庭芝節度日與之戰與趙

孟錦力戰於鶴背敗績後謀奪駕不克元既破揚州攻真益急趙孟錦失足墜水中死苗再成身生被獲不屈死而

陽立特授翊衛大夫依前闕州觀察使陞帶行

帶御器械知涪州誥

勅多難維其棘緬思蜀道之艱十乘以先行式固涪江

之守慨蛇豕食上國之慘恃熊羆不二心之賢趣戒勤  
王之師峻放進律之寵具官某雄姿果毅義槩魁閎撫  
鳴劔馳伊吾壯哉敵愾勸戎車伐獫狁偉矣折衝玉關  
憺其威名金城倚以屏翰輯寧五郡保障一方天降割  
於我家重以投鞭斷流之患心固不在王室挺然纓冠  
救鬪之懷遣將校而奏帛書陟險阻而承羽檄聞者興  
起發於忠忱念江浦之巢窟未清而荆益之襟喉猶梗  
欲霆擊而颺掃蓋卯命而辰行是用升翊衛於橫班墜

扈帶於邇列褒乃勁節亟其疾驅獎三軍攘姦凶以報  
先帝辟四方徹疆土肇敏戎公投袂而來反席以俟可  
劉師勇特授左武大夫依前濠州團練使帶御

器械平江府駐劄御前諸軍都統制誥

勅戰功日多莫難乎先鋒之勝賞國之典莫高乎橫列  
之階我有勁臣特颺茂渥具官某俶儻扶義雄烈逸羣  
統率戈船既振威於海道訓齊武旅爰養銳於毘陵趨  
潛師而進呂城欲乘勢而復京口中權後勁冒矢石以



身先彼竭我盈誓旃裘而膽落執訊獲醜敵愾獻功載  
嘉後亭橋之奇勲峻濟東山閣之華秩佇奏肅清之捷

嗣膺褒擢之恩可

師勇復常州大出舟師與孫虎臣張世傑戰焦山大敗歸常州城破以八

騎突圍走平江後率所部入於海

謝方叔特贈少師誥 咸淳八年

勅舊人不遠省甫放休復之恩一老不憚遺亟鑑餘忠  
之奏聿懷耆彥載錫愍章具官某秉心純明制行果毅  
振直聲於言路迪簡先帝之知聳雅望於政塗遂登上

相之任裕於進退介以壽臧致為臣而歸從容知止雖爾身在外注想詢猷念未踰衛武之年曷弗瘡平津之疾惟德爵齒昔所難兼若老成人今其餘幾九京不可作已亞師於以贈之噫就珍從以乞言嗟清規之已遠及生存而加綽慨榮命之不先禮貌具隆始終無愧可按宋封贈制皆中書舍人執筆惟紹定六年史彌遠贈中書令追封衛王令學士院降制學士言非典故詔特與降制是可以見當時法制之定矣

江萬里特贈太傅誥

德祐元年

勅多難維其棘方加壁以趣來一老不憚遺愴懷沙而  
永逝哀哉殄瘁聞者盡傷慨歎精忠時颺愍冊具官某  
文起八代之陋學貫六經之傳休休其心有容得宰相  
體蹇蹇匪躬之故先天下憂九齡惟偃月之猪諸梁深  
如歲之望若涉淵水求濟尚明保予猷詢黃髮固慙惟  
克邁訓聿懷勸講之助駭聞遺扎之言寇至盍去諸弗  
易子思之守人莫我知己寧從彭威之居凜一節之不  
渝雖百身其莫贖賁以蘇軾之謚禔以謝安之官將興

百世而立懦夫用張四維而厲臣節噫仁必有勇嗟予  
共納誨輔德之賢義重於生可以媿臨難苟免之士英  
魂未昧茂渥其歆可

江萬里特贈太師誥

勅君子式黃髮莫崇乎齒德之尊聖人有金城莫難乎  
節儀之守嗟予大老逢此鞠凶用震悼於朕心肆表章  
其芳烈具官某浩氣剛直德性高明孤忠自持屢墮林  
甫偃月之計特立不倚靡附賈克夕陽之女媿歸乎來

克邁乃訓若金用礪方浴汝說之賢懷瑾握瑜永慨靈  
均之恨御事罔或耆壽昊天不弔憇遺哀哉殲良潛焉  
出涕彼誤國不死適以遺臭萬年維殺身成仁凜乎生  
氣千載禔師垣之極品賁衰斂之殊榮噫三公惟其人  
悵失扶顛持危之助九原如可作尚與廉頑立懦之風

可初萬里聞襄樊破鑿池芝山後園名曰止水及兵將  
至隱草野間為游騎所執大詬欲自殺既而逸歸城  
破謂門人陳偉曰大勢不可為今雖不在位當與國為  
存亡既而軍士執其弟萬頃索金銀不得支解之萬里  
遂赴止水死左右及子鎬相繼投沼中積尸  
如疊翌日萬里尸獨浮止水上從者斂葬之

印應雷特贈端明殿學士誥

勅賜弓鉞以顯征夙懋建方之績聽鼓鼙而思帥載放  
追命之褒其敷言綸用勸臣節具官某宏材任重實學  
濟時知仁勇之脩身文武為憲剛大直之養氣精神折  
衝戒我師以鋪淮瀆雖在外而心王室有嚴有翼制勝  
尊俎之間惟築惟征守圉金湯之固月捷方奏星隕遽  
聞愴召樹之餘思想羊碑之下泣彼忌功而沮善茲更  
化以懷賢念國步多艱朕安得頗牧而用若承明遽職

爾未膺光鎮之榮植錫寵於密章俾眠恩於政路九原  
可作千載如生噫劉毅不為三公每懷撫几之歎許穆  
加贈二等尚歆綏衮之華獎其忠勞聞者興起可

唐震特贈華文閣待制詔

勅事君能致身封疆之寄為重自古皆有死忠義之名  
長存朕慨國步之斯頻嗟臣節之未厲載嘉砥柱之操  
三歎磬聲之思具官某剛毅近仁質直好義河北諸郡  
獨有真卿睢陽一城莫救許遠孤壘危於朝露勁氣貫

乎秋霜壯矣結髮白又可蹈也哀哉握節犀軒三禩之  
乃次對乎松階俾廟食於樂社錫以令謚錄其遺孤

闕

若中興之褒唐重九京可作尚百世以祀番君

諒爾英魂歆我愍典可

伯顏兵順流而東唐震度兵力不支死於州治之玉芝堂通判

萬道同  
以城降

汪立信特贈正奉大夫誥

勅名臣文武略盡亦惟大艱良士旅力既愆不印自卹  
駭聞遺扎愍錫襚章具官某謀猷川行知畧輻湊賢長



城遠矣才兼牧御之能曰閩外制之身佩翰藩之寄慨

懷危難倚任攘除擊楫之志未疇聽輦之思何及納書

裘邑隋三品之崇階鳴劔伊吾想九原之生氣可立信以二

策上賈似道言不從請備街壁輿櫬之禮似道罵曰瞎賊狂言敢爾及蕪湖出師相遇似道撫立信背曰不用

公言至此立信曰瞎賊更說一句不得今江南無一片乾淨地某去尋趙家地上死也置酒召僚屬手自為表

起居三宮與從子書屬以家事絕吭而死伯顏聞之曰宋有是人使果用之我安得至此

趙與禔特贈朝請郎直華文閣誥知寧國縣

勅具官某王事多難孰非全軀避禍患之臣宗子維城

獨效捍敵死封疆之節聽磬聲而愾歎錫綸命以寵褒  
爾振振周公族之英謇謇楚同姓之操志堅即墨之守  
躬蹈井督之危方免胄以衛民竟結纓而徇義傷哉賢  
令惟此鞠凶增十秩以追榮嗟百身之莫贖仍躋延閣  
並錄孤兒俾廟食以旌忠尚毅魂之殄虜可

德祐元年并  
天元取寧

國縣知縣趙  
與澹死之

### 王栢特贈承事郎誥

勅某朕惟正學不明士習頽靡人心陷溺稔成艱危是

用崇獎宿儒使聞風興起爾祖為淳熙名流爾家世其  
學文獻淵源博以諸老之琢磨養粹德深卷道不試從  
臣有請追賁京秩當孔棘之時所以張四維扶世教也  
詔於幽扃服享殊渥可栢大父師愈受學楊時父幹世  
游朱呂之門栢少號長嘯年三  
十始知家學之源以長嘯非持敬之道更號魯齋聞何  
基得黃幹之傳遂往受業於朱熹著述致力以求其極  
律身以敬治家以  
嚴動默皆可師也

孫虎臣特贈太尉誥

勅國家多難既無死封疆之臣節義大閑是為衛社稷

之本嗟忠臣之玉折錫愍冊以袞褒具官某英槩雄深  
壯懷卓犖威謀制勝蚤奏縛青宜結之功焱勇冠軍常  
有封狼居胥之志敵方投鞭而闖我意欲折筮而答之  
江湯湯武洸洸屬以討叛之任陣堂堂旗正正誓以滅  
敵為期乃俾守符乃授齊鉞關羽待卒伍之善尚忍負  
之田布報君父之忠惟有死耳義重熊掌身輕鴻毛旃  
裘聞之寒心營壘莫不流涕朕撫几以歎聽輦而思駭  
聞遺札之言愴失名將之雋密印紫綬追封尉府之崇

直蓋犀軒納書獻禊之飾哀百身之莫贖慄千載之如  
生噫存弗獲居絳侯勃之官歿尚享段秀實之贈諒而  
毅魄欽我恤章可

元兵入秦州虎臣自殺虎臣嘗以數  
騎生縛不花太子關以為質後殺之

夏松特贈保康軍節度使誥

勅事君能致身封疆之臣尤重自古皆有死忠義之譽  
長存聿懷磬聲之思載錫斬禊之典具官某威名濟於  
世媿兵畧得於家傳裕父功惟我有臣如李愬之在唐  
室若內舉皆堪為將如曹韋之在本朝慨強敵之窺江

統師干而揮寇塞旗者數矣勇不顧身纓冠而救之志  
於狗國嗟將星之遽殞懷義氣之如生授齊鉞以飭爾  
忠賜令謚以褒爾節噫加等而獎許穆重惻我心登壇  
而拜淮陰莫追既往英魂未沫茂渥其歆可

松夏貴子  
力戰被殺

議者謂松尚在貴  
未必敗亦未必降

尹玉特贈濠州團練使麻士龍特贈高州刺史

誥

勅具官某見危授命者義之先致果殺敵者忠之大邇

者熊羆之士進援毘陵鼓三軍倡勇敢爾玉以贛水之  
師爾士龍以淮濱之旅擢鋒力戰隕於行陣而醜類之  
殄殲甚衆爾身雖歿可以愧怯懦退却者是用贈玉戎  
團之秩贈士龍刺史之綬英魄如生尚克厲此敵而剪  
滅之仍錄羽林之孤俾忠義之臣咸勸可

二將戰常  
州玉戰五牧

士龍戰虞  
橋皆死

資政殿大學士兩浙鎮撫使謝堂該明堂恩封

贈曾祖深甫特贈太師進封魯王誥

勅肆祀有來雖雖裒對宗祈之嘏秉德其鄰翼翼肅將  
使範之恭維賢相之流光施曾孫之濟美式敷餃澤申  
賁密章具官某故曾祖某德載鼎彛功高廊廟鄧太傅  
佐中天之業實鍾長樂之祥郭汾陽著貫日之功丕衍  
具慶之祉袞繡焜煌於三葉旌繁炳耀於六符助我明  
裡錫以多祜師垣王社人爵之貴可加贈策絲言祖烈  
之傳無斁可

深甫相  
寧宗

祖渠伯特贈太師追封魏王



勅多士對越在天咨政塗而相祀烈祖有秩斯祜懷世  
德以敷恩眷言棠笏之傳追賁松楸之享具官某祖父  
裳華文獻喬木聲猷高密之仁至訓而報益大汾陽之  
烈在曖而慶彌長維思齋之功有開必先維立政之輔  
垂憲乃後約軼錯衡之來假和鈴倬草之有光告於文  
人仍繼師真王之秩介以繁祉繇重珪累衮之休可

父奕昌特贈太師追封魏王

勅我將式文王之典資時使領之賢崧高褒申伯之功

溥予祭餒之惠惟宗祀以教孝用篤親而興仁具官某  
故父某大盈若冲甚德而度裳華有章矣尚長君退讓  
之風緇衣之宜兮遵鄧侯法度之教象賢睽暉於政路  
駿奔陪祀於合宮嘉乃義方錫之愍冊更康叔國仍異  
姓王之榮作畢萬封衍後嗣人之慶可

母吳氏特贈齊魏國夫人

勅松高維翰之功推本生賢之慶召南積行之美端繇  
正始之風朕命賢戚而鎮京師秩禋祀而敷餒澤異

闕

密聯於政路徽章申賁於母儀具官某故母某氏文獻  
名臣之家柔嘉女士之德禮共繁沼屏流水游龍之華  
教淑芝庭行襲紫傳龜之祉蟬媽萬石之賚鴻漸兩社  
之班綏輯王畿凝皇皇奠枕之績肅祗使領儼峨峨奉  
璋之容睽義訓以有原諒孝思之追遠錦囊象軸大國  
兼齊魏之封翟弟魚軒千載垂陶孟之範告之禰廟銘  
之鼎彝可

知樞密院事兼參知政事李庭芝妻徐氏特封

水國夫人

勅朕稱宗祀適求教功常武之脩我戎式倚籌帷之彥  
殷雷之勸以義載嘉壺範之賢其錫綸言用敷餽惠具  
官某妻某氏廸內則之訓藹女士之芳鵲巢夫人起家  
助召南分陝之化燕喜令妻受祉集魯邦膺狄之勲采  
薇之捷既聞彤管之褒可後宜其家而有譽貴於室以  
特封翟弟魚軒賜沐浯溪之國鸞書象軸增光袞路之  
榮可

隆興府靖安縣管下利澤昭應普安王特封利

澤昭應普安清祐王

屈平

勅古之烈士精忠貫乎日星沒為明神靈光射乎牛斗  
維三閭之姱節懍千載其信芳於民有功以德詔爵某  
神清白死直博譽好脩仍羽人於丹丘已曾舉太初之  
表冠切雲之奇服猶不忘南國之思惠綏黎元銷禦菑  
沴肆丕從於衆顓式敷賁於號榮蓂茅兮吉占其歆兩  
美蘭鞠兮終古以續九歌可

荆門軍玉泉寺壯穆義勇武安英濟王特封忠

壯義勇武安英烈王

關羽

勅頗收為將豈憂匈奴每懷雄俊廉藺雖死常有生氣  
未沫英靈載錫之光亦克用勸某神才高三傑勇敵萬  
人蓋嘗乘漢水之溢而攻樊幾於震曹瞞之姦而徒許  
功雖靡竟志則不磨其餘威猶足寒戎心非更封何以  
慰荆旅用旌忠臣之節丕顯烈士之風二名孔嘉永賁  
傳芭之祠楚九京可作尚能結草以抗秦

咸淳三年十一月臣應麟以起居舍人兼權書行  
吏右禮工房七年七月自徽州召為秘書監兼權  
十月供職書行吏右禮刑房十一月除起居郎兼  
仍舊八年七月書行吏左戶房德祐元年三月真  
除舍人四月供職書行吏左戶兵刑房七月除禮  
部侍郎兼又書行吏右十一月除禮部尚書兼給  
事中辭西省兼組凡三入掖垣徧行上下房辭命  
臣應麟謹識

記曰王言如絲其出如綸然則誥命之體其可不慎乎文章至宋季風頽波靡矣而王言終不失體南渡以來龍溪汪公平園周公號為冠冕若厚齋王公尤所謂傑然者也咸淳德祐間社稷傾危近在朝夕而公四入中書遍行諸房詞命方除目填委他舍人閣筆不下公獨從容授之若行雲流水悠然泛然而莫知紀極者今讀其辭蓋會集羣言而以己意發之信所謂博極



羣書者也昔三槐王公序南豐文集以大手筆  
目之且謂名與天壤相敵嗚呼豈獨南豐也哉  
後學滎陽生鄭真再拜謹識

故觀文殿學士正奉大夫墓誌銘

詩書所稱世臣之美盛矣惟宋豐芑涵育之仁逾三百  
年父子為相者三家鄞史氏與焉燕及後昆第祿昌衍  
蓋世德之積也厚而承德用譽亦在其子孫故觀文殿  
學士正奉公其淳德有常者與越在內服靖共厥位越

在外服惠政施於民涉世變守素履耄耋弗更其操近古所謂吉人長者公既葬前進士黃君翔龍纂次行事子嘉卿等請著石章應麟嘗執事太史竊觀先朝盛際上以禮義遇其臣下以忠厚世其家法宜書贍彼喬木巋然故國慕乃祖乃考銘於烝彝鼎其可使遺老無傳茲後死者之責不敢辭公諱字之字子發世為明之鄞人高大父詔以八行舉於鄉贈太師越國公曾大父師仲贈太師越國公大父浩相宋孝宗為太師保寧軍節

度使封越王謚忠定侑饗廟廷父彌遠相寧宗理宗為  
太師保寧昭信軍節度使封衛王謚忠獻母番氏齊魯  
國夫人公忠獻季子也粹溫端愍忠獻以福艾期之謂  
它日亢吾宗初命承事郎紹定五年中吏部銓自寶章  
閣至右文殿脩撰奉佑神祠除將作少監賜同進士出  
身遷樞密副都承旨忠獻薨服闋除司農太府少卿集  
英殿脩撰仍畀佑神祠即家授沿海制置司參議官進  
寶章閣待制賜金帶陞華文閣知處嚴溫三州皆力辭

理宗睦受遺定策之勲曰篤不忘公允忠清公宅之既踐別中外入式樞機公怡默自將澹於榮進上欲試之治民廼以敷文閣待制守婺時淳祐八年也婺比歲旱飢出橐裝糴浙右米三萬石徃賑貸民罔捐濟易守處州始至獄多淹繫閱實上部使者讞訣圜扉一清賦稅三年民苦之公倚閣其一年版部期會苛迫以已俸代民輸未幾督趣如故公以累年之逋一朝求足民必重困奏以三十年最高者為數疲民感悅忠清之喪以在

原急難謁告奔赴得請遂行牽釋遮道攀留召為兵部  
侍郎辭不拜進待制寶文閣提舉祐神觀擢工部侍郎  
權尚書願就散秩陟寶章閣學士提舉萬壽觀奉朝請  
寶祐二年召為兵部尚書以煥章閣學士知紹興府浙  
東安撫使惟祖惟兄遺愛在越公來鎮棠陰耆老驩迎  
念紹先哲壹以寬和撫柔此民初忠定作牧勗義田為  
士大夫賢而貧者喪嫁之助歲久實惠不濡至是扼弊  
擲蠹始復舊規越為南陽鄉公寬而有制無所回撓郡

大閱一夫徑造聽事乃卒伍怙王邸勢者公曰犯階級  
有常刑執而黥流之軍民慙服咸曰仁者之勇甫菴治  
最轉聞璽書褒美陞徽猷閣學士因任尋除工部尚書  
五年進長兵部兼工部宗祀明堂為橋道頓遞使禮成  
拜端明殿學士時畀執政恩數懇避甫至斷章批畲曰  
卿繼忠孝謹牧養予維寵嘉之祖孫父子昆弟先後列  
政余惟呂氏暨卿門式克欽承以為邦家光景定二年  
進資政殿大學士知建寧府承葉公夢鼎陳公昉之後

廉明勤儉遵其成規南方多嵐霧日高乃視事公常夙  
興見吏民不以素貴少懈夏潦崇安松溪水汎溢民懲  
壬子菑扼携杖入郭公盛服露禱為民請命移時澍霽  
橋梁度馬幾墜民凜凜沈墊亟募舟楫拯之有阻渡剽  
攘者罰無貸黎明水退民以更生胥慶建俗機鬼惡少  
身殉淫祠愚眊神事之公捕為首者正其罪谿流湍悍  
競渡鬪爭多覆溺嚴為科禁俗遂革閱歲再召進觀文  
殿學士提舉萬壽觀奉朝請居生母齊韓國夫人林氏

憂衰毀過禮咸淳二年終制以舊職知寧國府郡上供米隸淮東西兩餉俾其屬受委輸淮西使者治建康地近符尤峻或轉餽江北跋涉耗失綱欠數十萬計而郡官兵廩餼常不給公控籲於朝始得頗隸淮東郡以稍紓明年祈閑提舉洞霄宮優游里第垂十載自是閱光啟華若未始有軒冕晚歲闔門養疾一榻蕭然人希識其面至元三十年病革卻藥遂不起春二月十三日也年七十有九階自初命至正奉大夫爵自鄞縣開國至



奉化郡公食邑四千六百實封戶六百娶洪氏娶高平  
郡主趙氏皆先卒子男五吉卿承議郎文府寺丞知武  
岡軍先一年卒沂卿承事郎為兄待制後嘉卿彭卿並  
承事郎韋卿女子六孫男六辰孫觀孫景孫慶孫增孫  
滿孫女四曾孫男一公頤女二是年四月丁酉葬於鄞  
縣陽堂鄉金輿與高平令兆公性孝友敬保先緒躬躬  
如弗勝諷訓言罔敢墜忠獻冢木已拱隧碑未立論撰  
先德屬吳公淵狀其行進徹乙覽理宗用至道熙寧銘

兩忠獻故事親製文題其顏曰公忠翊運定策元勳之  
碑奎藻漢章賁耀松檟孝子揚父之美公有馬別墅在  
錢塘西湖密邇枋臣私第欲得之謀以榮利公以先人  
舊業終不與姊適故戶部侍郎趙公汝楳蚤卒寔奉化  
隣山有訟公割田易之爭者遂息樂善不倦故家流風  
猶存名譽以謙亦允蹈之處鄉黨恂恂似不能言與人  
交臧否不出諸口而胸中有涇渭躬自菲薄服用如臞  
儒治五郡護本根緩繭絲雖無赫赫名一念愛民隱然

膏澤之潤純終領聞集享備福克對前人光於戲賢哉  
銘曰

史以官氏相肇於唐迨宋昌大台緄相望有若甘盤有  
若伊陟奕葉鈞衡太常紀績象賢惟公胙乃舊勛用彰  
厥善不專為恩佩玉徐趨翔於常伯處富無驕在豐能  
約迪闕 瞻知職聯輔臣素有世舊豈伊異人公拜稽首  
對揚明命紹聞衣言秉心無競始政於婺終政於宣振  
之平賦民瘼以蠲禹會侷藩維祖賜履憇棠勿剪二季

泣止愛民厚俗漢吏之循安靜悃悞善不近名巖居川  
觀殊庭燕佚仁者之壽秀眉華髮時行則止脫屣浮雲  
一其初終駒皎鴻冥嗣守維艱前脩所歎允矣君子歸  
飛無憾曰晉遺老曰殷故家胡不百年鄉關之嗟古楬  
蒼蒼眎此銘誅忠定之孫忠獻之子

史鄂州墓誌銘

鄂州君史育之字子報贈少師彌鞏公之子補國學生  
以父任知婺州該遇明堂恩補通仕郎銓中授從事郎

峽州遠安縣尉仕至添差通判太平州改通州鄂州轉  
朝散郎卒於官居官廉所至有遺愛乾淳初余始第進  
士侍先君於吏部倅婺明年少師來守郡君侍焉兩家  
子弟相好也君二季皆余同年友耄矣懷舊重有感焉  
銘曰一邑之政天下式澗瀝有訓為世則君才恢恢優  
治劇佩玉長裾進匪棘井深不食心靡惻殖豐履歎志  
弗絀巖邑嘉庸得目擊我銘表善貽千億

越大夫贊

智哉大夫鵬塞海瀕淵謨石畫為越良臣處女脫兔神  
機翕張澡會稽恥於禹有光吁嗟烏喙殲良忘功室既  
顛薨梓匠弗庸彼脂韋者自詭明哲謂不如蠱謀身之  
拙工於謀國匪曰為身論士賢愚不以死生出者難將  
處者易持卓矣黃公巖居茹芝犧樽溝中木雁兩失鄣  
水泱泱我思竒傑

悼袁進士鏞詩

大柱不可折柱折勢莫撐九鼎不可覆鼎覆人莫扛袁

公烈丈夫獨立東南方欲以一己力代國相頡頏適遭  
宋祚移眦為不義戕奮然托志起誓欲掃欃槍拔劔宓  
前麾手回日月光賊勢愈猖獗山摧失忠良嗚呼絕倫  
志不得騁才長妻孥悉從溺枯骨誰克襄忠烈動天地  
游魂為國殤山水倍堪悲抱恨徹穹蒼穹蒼率一息庶  
幾紀星霜西風白楊路哀猿號崇岡解劔挂墓柏泣下  
沾衣裳惜哉時不利抽毫述悲傷

四明文獻集卷五



王深寧文集跋

王厚齋先生博學鴻才偉論卓識見諸立朝居官疏議彪炳史冊少從師授得呂成公真文忠之傳所著書凡六百八十九卷古今撰述之盛前無如葛稚川其次即先生稱極富矣通行天下者祇玉海困學紀聞詩地理考紺珠詞學等書至手著序記表誥辭命誌銘之類闕焉未傳誠為憾事歲癸未余屏跡家門友人劉君讓以鈔書見售閱之乃四明文獻也採輯

者乃滎陽外史鄭公真也曷勝狂喜不惜重貲以應  
寒士之請把讀終卷間有未經詳明者僭為補綴有  
它處散見者輒為增益以成全集庶使文獻有徵不  
致瑰竒泯沒第愧弗能將付剞劂以廣其傳姑繕寫  
襲臧俟之來括云爾

同郡後學前柱下史陳朝輔變五父謹識於雲在樓